

茅鹿門先生文集

茅鹿門先生文集卷之五

歸安茅坤順甫著

書

與劉沂東憲使書

言別以來十五年于茲曩所共公促膝而談啣盃而呼者猶耿虹霓襲簪舄而照環珮者也今且摧抑剝落神日以稿而髯日以抽白譬之江上冒寒之蕤戴雪之枝淵明所謂欲盡者而已耳沂東公其似之乎抑獨有頽然故吾者乎同進者三百人而同心無幾僕所以倚茗而吟登弁而嘯未嘗不

書

卷之五

從南來之鴈而夢且思於溫陵之墟者前讀邸報
知我公猶有郤氏鬪雞之釁僕獵襟起爲索欬者
久之老氏不云乎攘無臂仍無敵君子於盛氣之
之士則俛首以下於險詖之夫則坦然若夷此則
吾黨所以歷蜀道之難而翛然林壑而胡爲乎霜
露之霑衣也已而訊閩來學士大夫直我公而右
袒者什之九僕稍稍放心耳劉少郭過草堂又獲
聞起居甚慰甚慰茲特爲書附候文刻十一卷附
上求教

諭吳顧兩生考遺才書

今之高才生往往督學使者輒擯而遺之非盡有司之罪也大較由諸生所爲文於精神之所措注類多緩散疎漏不能中窾於文藻之所傾吐類多龐雜繁蕪不能秀逸以故幸而及其有司之瞪目而視則骨理猶在故得並爲甄錄稍及其厭倦時則擲而去之矣故古之論善射者必首養由基以其射楊葉於百步之外而百發百中也二君其養由基之射乎抑亦世之所稱穿札洞胸者而已乎苟諸生之爲文不特自挾其穿札洞胸者之技與能而必求養由基者之至須於精神之措注處譬

則引江淮之水而灌之百川之間大者劃城邑縈
河山細者導蟻穴疏鼃竇於文藻之所傾吐譬則
懸明月於牛斗之墟而下照四方也方其吹金波
洗玉繩濯浮埃輸灝氣蟾蜍之所不能食河漢之
所不能挹關山之所不能斷雲煙之所不能翳閨
姬戍婦之所倚而淒然以吟胡笳虜騎之所憑而
悄然以悲遷臣騷客之所宴眺登臨而翩然以賦
則靡不善矣且有司者之校遺才也大略必掇題
之最難者以困辱諸生非極長者一二百言瓜蔓
葛引之題卽單文斷簡而枯且急者之題於是時

請二君凝神而思當其瓜蔓葛引處便須如提太
阿而截犀兕剗虎豹殊有獨得刪繁就簡洞中神
理之解當其單文斷簡處便須於絕處逢生死中
求活如入山者之轉窮谷而劃然天開如鑿井者
之及虎跑而盎然仰出又若將探之不窮引之不
竭此則古人所稱舞大娘之劍觀廣陵之濤而低
昂舞袖素車白馬相爲俯仰於吾之心目之間而
無不如意者也不審二君以爲然否憐二君才而
不偶今且當背城一戰故披暑早起輒爲灑墨而
書者如此聊以助二君異日提瘡痍之卒躍殿後

之馬奮戈賈勇摧強摺伏於以收後功焉不盡不盡

與胡錦衣書

先司馬公戰陣汗馬之勞於吾吳越十五州郡間所當朝夕烽燧貽之枕席譬之決江漢之水而東注之數千里間無不家汲而戶飲者當是時

先帝倚司馬公爲大江以南一長塹也豈謂媚嫉中起謗書隨至以馬援銅柱之標而禍叢於薏苡以武穆河朔之定而身死於囹圄此縉紳大夫之所以按功令而流涕山谷父老田里婦女之所以

耕不忘耒織不忘杼於今絜歔而太息也嗟乎曩
之所從 朝廷宮掖之間乘瑕蹈釁而甘心攘袂
者非死牖下卽擯朝請矣以予觀之當時雖屬快
意而異日國史之書稗官之錄所以貽訕於沒世
以發仁人志士之痛且憤者能掩乎哉雖然頃者
執政高公採諫臣之請而復之故官中丞謝公採
地方之議而改之特祠其所以慰先司馬公九原
之靈者亦千百之什一矣而惜也贈諡未下祿廕
未加吾輩徒恨抱束髮之知卒困之垂翅之年而
不能如劉向之訟功於漢庭者蓋耿耿也近謁先

司馬祠賦詩四首亦賈生之過湘水而投書以吊者已繕寫附上伏惟垂覽聞兄過西湖僕所願假之翼而南見者顧適病足姑就瘍翳數日當卽拿舟過焉勿罪勿罪

寄汪南明少司馬書

僕無似間嘗竊讀古六藝百家者之遺言頗切嚮往願附世之作者考見其至也顧仕路不偶垂翅來歸譬之鳴埵之蛙吟草之螢一丘一壑之響而已間過故總督胡公幕府覽睹公所著贈文輒呼曰茲固流商刻羽之音也非世所雄草竊影附而

已者然恨不及多讀也一二年來學士大夫間出
公所刻墨副携示稍稍醉心而解頤焉又稍稍窺
公所繩墨古人者之似盛爲鼓鑄斧斤而獨求其
至此於其間譬之楊雄之書世或多所好而恐亦
非侯芭之所能知而指言之者且雄如昌黎猶憂
戛乎塵言之難去而公則獨提干將莫耶之劒剗
犀兕而截鴻鵠世之臭腐並一朝而剗割拊挾之
矣嗟乎嗟乎公非今之赤幟於以滅秦蹙項而百
戰咸陽成臯之間者乎僕願左袒而過公帷焉顧
未有路也適胡錦衣過西湖敢仍歸鴻薄效奏記

外家刻十一卷附上求教

與凌太學書

兄刻史記評林書而猥以序文托僕僕老矣及讀兄所示凡例諸條僕多未諳間欲共兄面訂本末而後屬草已而思兄業有成書矣雖欲請之恐屬無及故遂揣摩兄之蒐羅百家與其鐫記者之勤稍稍詳次之謹令繕寫呈上不知能副兄所望否太史公之文漢西京以來絕調也僕嘗妄謂千餘年間世之學士大夫知好之而未必能言之卽醇如劉向博如班固奇如韓愈逸如歐陽修適宕如

蘇氏兄弟似登其堂而闖其室矣然亦才指各有
所近不可不謂之異曲而同工而要其不相授受
處則猶然在也嗟乎嗟乎兄今強僕序之竊欲起
太史公於九原與之面爲擘畫措注而後點綴焉
而恨無路其所欲爲兄吐露什一然已譬之啞兒
喫苦瓜口欲言之而又有終不相及者已嗟乎嗟
乎兄得無以我爲癡人說夢夢時若了了而夢醒
後又黯然蒐銷卒無一言相指畫者乎不盡不盡

與袁太冲書

太冲以忤當世坐罪奪官歸客或傳太冲不樂見

賓客往往匿身煙霧間嗟乎嗟乎太冲其古之逃
虛者乎抑亦世之所不忍組紱之棄而簪紱之遺
者乎如前所云則必莊生之傲漆園而不受楚王
之聘於其初可也如後所云則又區區於破甑之
顧而浮漚之滅者而量太冲又不欲以之困約其
身爲也然則丹丘綠水之間吾獨不可以掃巖而
臥枕谿而釣也乎閩中游君以舊從事過齋中特
爲濡毫而書寄貽左右倘太冲不以僕所言爲嗤
抱琴而過湖焉僕願從太冲側耳而聽白雪之曲
也

與郁秀才書

承兄屬僕表先君子之墓愧予非閒於文者不足以副仁人孝子之思及手王廷尉與陸京兆公所爲誌與狀叅而互之兩公之言或人人殊甚者自相抵牾始以爲謹厚而中或以爲節俠始以爲稍稍事節縮而家用饒富而其後也又或以爲散子母錢不收而家且衰落大都近代以來縉紳先生好摹畫史記漢書爲文章而於公卿士庶誌銘傳記特借史漢之膚髮以爲工而於斯人之神理或杳焉而未之及此僕所以面其兄云云而不敢妄

爲之屬筆點綴於其間也夜聞兄所云歸輒勒草如別紙據愚見業已刪其複者雜出者并遺其繁蕪而無所事者於先君子平生本末或稍稍櫛絲入杼得其什五竊恐兄又不免謗陋之厭且疑其非史非漢而或以爲罪也如何如何僕嘗覽中峯禪師所爲對鏡而像而自爲贊二百年來猶令人神思飛越若睹如來者僕拊掌大笑曰世之學士作誌傳恐亦須如是始得其解也不審兄謂然否

復王賜谷乞文書

僕以病客臥茗土久矣忽獲公手札并詩刻及品

茶記與種種惠遺譬則相如之渴而飲之以金莖
之露者感刻感刻讀陽湖紀略曩所從公席上飭
畫山川之概已稍稍襟帶間特其圖聞使者已授
家奴猶未及覽也夫古之善記山川莫如柳子厚
子厚材固雋然亦以朝夕鋤鋤愚溪間故得以恣
其盤谿邃谷飛泉峭壁之好而肆焉以爲文苟不
得於其遊則必及於其圖庶幾恍然神遊也不然
則未免犯古人所稱不得乎其心而爲言不得乎
其言而爲文者之戒恐終屬恍惚不能刻畫也雖
然公之向平之度則翩翩乎古之人矣僕不能文

姑遲東歸爲公記之秋深木落當囊稿以獻也不
盡不盡

與翁司馬書

頃於樵李道中偶逢麟陽宗伯官舟稍及口晝嚮
所聞者於今杳無音耗特括蒼永嘉一帶道路之
人猶稍稍訛言耳然聞中朝別以建言者榜募
膂力敢鬪及知兵略之士雖未必得否抑足以少
戢姦雄者之心而默禡其魄使有司能借此從中
網羅且推心腹以待之亦一奇也如何如何

與胡參軍書

先司馬公沒且十餘年於今猶附殯宮中外百執
事猶不及請 聖天子如古者所築祁連山及
給秘園之器以葬此 國家缺典也吳越間數十
州郡無不人人抱痛持悲絮歛太息而不能已者
而况我輩一二肺腑之交乎頃者戶部所下覆勘
軍興云云浙中諸使君頗洶洶動搖令弟錦衣過
亦危且懼矣已而幸及中寢盖亦以監使者朱白
野公故知先司馬公曩爲御史時會先司馬公逮
繫業草疏論拯已而聞 世宗詔釋不果上而
其所爲先司馬公切劉向陳湯之訟者耿耿也僕

以此稍及從中關說之又繼以大義折之而此君
遂及釋然他如杭州守吳韞菴公所中持處亦多
韞菴公殆長者其仕浙中已久習聞諸將士吏民
者家戶而戶祝之口故不忍以拂公議耳非特州
里之共而已也近擢溫處兵備僕贈文亦以此壯
之敢并錄覽且以見我輩所持天下之公而不忍
沒其善耳嗟乎僕衰颯甚矣恐不能久人世所願
聖天子早採臣下之疏禮葬先司馬公而僕
得抱文一哭於其墓以雪百年之痛此則沒且不
憾者於今未及也如何如何

與宣府中丞張崱嵎公書

言別已久夢思毋忘且以公之才與望按節東南者幾十年于茲矣而數坐事他徙倏躋倏起俄而河朔俄而上谷天豈異公萬里騁裒材顧欲使之越國過都遍封疆歷險塞邪然而天子盛明虜囚內欵幕府遠近之郊胡馬且不敢南向而牧矣公秉鉞過之得無如羊開府所謂輕裘緩帶其間者乎抑亦有橫槊賦詩如樂府所載出塞入塞諸曲於以思猛士而拂鐵衣者乎故人不可見而故人之襟期英爽大略從白鴈三秋時時流目也

僕年且隣七十鬢之雪而肘之枯者久矣綰帶之
思已屬隔世卽如公旦夕內召當在肘腋政府僕
竊欲載望顏色瞻節旄大都不可復矣茲因兒姪
輩從吏大同近且攜家過之道出幕府敢爲書以
獻稍通丘壑間尺寸之私云耳不盡

與許敬菴吏部書

董懋德同知公福祉且聲問奕然甚爲欣慰然而
以公之賢與才又屬科第二十年矣嚮嘗贈公詩
云同舍半開提督府故人已挂少師章蓋歎國家
用人不免如昔人所稱積薪之喻而公之譽望所

嚮何以不聞當塗者亟爲推轂也豈楊子雲頽然
聲利之外故中朝之士從而厭之邪太息太息今
年湖中舉進士數獨倍往時南宋而還似屬僅見
也公於同鄉號稱祭酒幸時時夾成之董甥及表
弟錢繼修知公舊屬世講一切刮磨更望加意聞
繼修年雖少其卓然特立處綽有廼翁家風茲固
同志中翹楚也

與沈少林殿撰書

僕聞未同而言古人所戒况衰朽之年譬之秋林
之萎翳矣豈敢強顏冒譏輕爲尺牘於賢豪長者

之側所恃者先公令獲鹿時僕以左遷洛州過焉
辱先公食我於羈旅康我於卽次賜之以綰帶之
交者舊矣已而先公入御史臺按節閩楚之間而
僕亦隨還舊京南之粵北之河魏宦遊之轍杳然
不相及而其兩相襟期而願以古之道共爲砥礪
者固耿耿也不審公過庭時抑嘗聞其氏名否乎
頃者 天子擢公賢良之對以文章領袖海內
僕私爲吾道喜然猶未之悉也客過山中者又稍
稍口公慷慨倜儻不獨區區文章之雋已也間籍
累朝以來首大廷者枚指而畫之大較公之器識

澹泊似張公子韶凝峻似王公龜齡而以古之道
抗顏執政則又與本朝羅一峯或不相遠他所
急故知輕千金聞鼓鼙之聲烽燧之色而介馬疾
馳則又似古之布衣節俠殆世之異人也嘗聞太
史公傳晏嬰於異代猶願爲之執鞭而况僕附公
同時而奮且州里之近齒相錯間又獲從遊先大
夫之後而敢或自外乎易曰同聲相應同氣相求
黃鵠搏九臯而遺之以音則鴈鷖鷦鷯之在樊也
猶爲延頸奮翼而側耳以和且鳴幽蘭杜若之在
湘江而挹之以輕颺也雖蓬蒿蕪蘼亦不覺相爲

晻靄而紛郁者固情也漢武康又稱公於青囊最深喜覽佳山水近且欲過湖中焉僕當邀山靈以俟

與胡舉人朴菴書

僕少時頗以舉子業自喜而世之學士大夫抑或以僕當竊一高第也已而鄉會試諸有司抑嘗首擬並不果此固數之偶不偶介乎其間而僕抑自恨於科場中殊自有失着也近年來舉業已多務新奇每一放榜一番炫眼抑不知舉子業故起於王荆公所厭詩賦取士而特設經義以求天下之

士蓋卽漢人明經遺意也而世之士旣競以新奇相高於經術遂疎而不講鹵莽闊略而怪且幻矣近於見曹輩得執事所中鄉試卷讀之中間文調雖不免與世之務新奇者相矜而於題中肯綮則大都已入宋儒箇中髓處矣惟其新奇從經術中洞關竅櫛骨理譬則孫吳之治兵本之正以出入變化百戰百勝無不如意未有不以詘天下之敵者幸兄慎自愛古人以未同而言爲戒然僕夢思不忘左右故不覺潦倒至此皇恐皇恐

與沈鐵山書

承借商子及曾子固隆平集二冊謹以返上商子
更法等篇太史公已載之史記其他篇什恐非盡
出商鞅者以其議論龐雜非盡商子本旨也曾子
固所紀豈亦有志於纂當代之史而爲之者然其
紀聖緒以下或及官名行幸而不及括太祖太宗
所罷藩鎮及建州軍草創之略其紀宰臣叅知樞
密使或及其簿書毛瑣而不及其出入將相之大
又如夷狄及他僞國等篇亦多草草其所當契丹
歲幣與西夏或臣或叛卒未此皆所關宋朝利害
之大者中多遺漏豈子固特零星綿蕞釋官野史

而爲之者而未及成書邪况書多訛字不可讀不知江南諸文獻家倘有故本可得叅訂而別刻之否亦後之竄修宋史者之助也不盡不盡

與翁司馬書

姪夔還得公報書并聞公開帷而見攜之刻骨刻骨秋以來星象示異遠近訛言已而聞公卿以下多易置者客或傳公且代張元洲公爲太宰僕於病榻舉手加額曰此宗社之慶也已而不果又數日客傳公改南司馬僕又舉手加額曰雖未及領太宰而南司馬故叅機務文廟來故所稱留

守者

武宗末年國家多故執政諸公特疏喬

白巖爲南司馬已而寧藩外叛

車駕南巡諸權

璫扈將殆鼎沸矣而卒賴以無恐公之茲擢

聖天子及一二執政大都在此願爲努力僕按天文占近日星異恐屬可憂者况南州遠近厚爲訛言私相煽動頃復有客從永嘉來且傳冬十一月江之鯉躍而雲飛者三其大如巨艦長可數十丈從空中揚鬣掉尾行數十里而後下海也又一日有傳海馬入城市者已而郡太守令獵者捕之及以入於監兵使則又類羊也海上人並未之習觀

者或謂孔子入楚嘗識商羊爲水災豈其似之禰
祥者君子所不道然大略並陰象也太史公嘗書
河魚大上魚鱗甲之屬也故爲兵兆 聖天子
在上賢公卿翊戴日月之際知 國家萬萬無恙
然公爲重臣幸博習材賢按古今覽名實不特南
都根本之地而已卽如徐邳江淮吳越閩楚之間
一切阨塞虛實文武吏士恐當一一料理以備不
虞僕茲言非特杞人之憂已也公方藉中外之望
於故人知已不得不僭及焉皇竦不盡

與王沂川舉人書

僕少附我公文章道誼之交其所相與砥礪行業
上下古今者不特世之區區宴遊盃酒而已也已
而僕起家宦遊多坎壈不偶昌黎不云乎動而得
譽謗亦隨之况故所忤執政者方席天下名利之
權以快恩讐不特擊之仕路并及其巖壑之間而
媒孽之彈射之又從而網罟之僕故不免僇辱幽
囚今且白首終焉已矣而我公之才譬之于將鏖
鄒其所薄日月干斗牛而耿虹霓者何如也世之
有司操尺寸之繩墨以格異材遂使海內名流如
我公者於今猶垂翅而不進公亦輒自悲歌慷慨

發憤於古六藝之遺其所上採孔孟下述風騷以
來百家之旨鼓鑄而折衷之一切著述或及讀或
未及讀大較足以要之不朽矣然則天之所以豐
公之材而遲公之遇得無在此乎嘗覽古之奇崛
之士荀卿韓非以下其所不偶於時而著書以自
表於後世者何可勝道也然則僕之罪廢之餘於
公又降等矣何者進不能爲國家建萬里勲退復
不能附公輩如所謂秋蟲者爲一丘一壑之吟以
自遺於身後甚矣其可悲也已近見公所爲序縉
紳先生之刻并其相與往復書僕竊奇公之氣異

公之言竊願拿舟海上從公遊且得探公東望扶桑北眺碣石者之深不知其肯許我否也

與翁司馬書

頃入西湖飲元洲太宰園亭相與口畫公所以席中外之望者不勝爲國家慶俄而傳邸報者過廼知公且坐詆賴天子聖明已及留用矣然不知詆者之口何指也又不勝爲世道錯愕竊歎不自己間按古今傳記所載臺諫故事大較盛明之世納忠乘輿汚濁之運疾攻權倖而兩相半則附君子者多攻小人黨小人者則毀君子然君子而

殺毀則必其材智繫天下之望而所自裋身者或疎唐之姚公崇宋之寇公準是也其勲業荷天下之重而所處名位者或極唐之裴公度宋之文公彥博是也不然或好著文章多所譏切則不免忌口如歐陽公修或起軍旅多所誅戮則反殺機如近代王公守仁廼若我公之裋身若畫錐而引繩也其名位雖列尚書猶散地也間發爲文章所不欲自口者而軍旅之柄又未之及然則以公譽望竊謂海內縉紳學士無問識不識當共爲延頸舉手以亟其柄用者而彼區區者詆口胡爲乎來哉

僕雖罪廢其於世之賢人正士之得志與否未嘗
不共欣戚而於我公今日云云則又多所刺心不
能不爲疾首感額於其間而竊願聞於左右也故
敢以書問

與王敬所少司寇書

僕不量少好著文章及繇吏部左遷稍益發憤間
陳古六藝及莊荀鼎賈百家之言而伏讀之妄謂
文以載道道也者庖犧氏以來不易之旨也孔孟
沒而聖學微於是六藝之旨散逸不傳漢興鑒秦
招亡經求學士雖不敢望聖學秦之所燔始稍稍

出共爲因言析義考究異同故西京之文號爲爾雅而魏晉以還惟唐韓昌黎愈柳柳州宗元宋歐陽學士修及蘇氏父子兄弟曾鞏王安石輩之八君子者賦材不同然要之並按古六藝及西京以來之遺響而揣摩之者其在孔門不敢當游夏列而大略因文見道就中擘理蓋嘗就世之所稱正統者論之六經者譬則唐虞三王也西京而下韓昌黎輩譬則由漢而唐而宋間及西蜀東晉是也世固有盛衰文亦有高下然於國之正統或爲偏安或爲播遷語所謂寢微寢昌不絕如帶是也其

他雖富如崔蔡藻如顏謝譬則草莽之裂土而王
是已况於近代聞人學士乎哉僕間嘗手評次之
爲八大家如別冊妄臆鄙度已載總序及諸引中
不審公謂然否僕嚮嘗共公論 本朝之文如王
文成公論學諸書程朱所欲爲而不能者諫佛辭
爵江西田州諸疏漢唐以來未之睹也公獨點頭
而海內學士大夫之好文而雄者聞予言頗共非
笑以爲無當予故於八大家凡例末稍爲及之而
姪桂讀其書頗篤好而欲梓而傳之欲借公一言
冠之首以爲重於世公倘無拒非獨八君子者大

振斯世予謏陋或得併附以見而斯文之未墜於地亦可獵襟而卜也已

與舒憲使書

僕罪廢已久譬之秋林之萎翳矣而公下車來頗憐舊嘗待罪南粵抑或間效尺寸於其土而曩之奪官或非其罪也數於伏櫪之駟而顧盼繁欵焉僕之感公知己之誼多矣今公擢爲河南按察使以行河南者僕舊所宦遊處也而公按節過焉以知己而歷所舊遊之地其間感慨蕭瑟情思特多頃者歲十一月以來冰雪異常商野殍甚且鳥

獸花卉竹木下及遊魚蟄蟲之屬並爲凍冽摧折而死者湖之北有具區爲震澤方五百里郡邑長老未嘗有及見其水合者今且危檣巨艦所嚮冰涸薪火阻絕中流躡冰而重負者殆數千人焉遠近驚駭僕竊謂五湖之間故不與淮北同何其陰凝亦至於此及近讀邸報大略不獨予五湖而內自輦轂外而邊徼蹈河踰泗以南其所困於冰雪之非常者不可勝數矣僕嘗讀洪範之書曰急則恒寒竊疑今國家中外之所嚮風而州郡之所習行者得無其傷於急已乎不然天人之際自古

記之何其故所聞與今所睹駭愕舛鑿遽至於此而河南者中州也古所稱天下之樞也公今乘軺方春過之倘憫中外之急特按古月令方春布政故事興賢釋滯一切以宣鬯_五₂₀主上德澤爲意則中州之所行四海九州之所環視而輻輳者然則使節所嚮天殆有隨之以暢惠風者已僕竊欲擬爲一文以贈公附之衣帶之間以申離別之思而歲之除夕從苕還家輒觸寒而病旬日來晝夜咳嗽喘息不接此所以於公之行也旣不及爲飲餞道左并其所欲爲一言以贈者且不能焉古人

賦別黯然魂銷僕臥枕席間情竊遙遙也茲特強
爲濡毫具書如左嗟乎僕亦困於寒已伏惟垂憐
焉

與潯陽董宗伯書

公以九秋由西湖泛胥江南登釣臺而入雲巖之
深忽已中冬而氷雪矣其所泝煙波捫霞嶠攀芝
磴摩石幢俯仰嘔歎吐吞日月古之所謂羽人不
死之庭公且遍歷之矣洪厓王喬者流公曾及逢
否僕願鼓枻而北將以扣公之深貌公鬚眉紫氣
之間而竊有請也顧方卜二婦葬事匍匐入山而

公曩時所賦歌於黃庭內院而貽之冊者僕間睹之大都唐之音響也茲遊也當必再倍之矣故特先爲遣使解公之裝而縱觀公所爲遊仙招隱之曲願無靳焉客有謝中台者少以高才生名於時今且博習青囊而獨得其深貴同年陳方伯敬亭公移書推之門下僕近與指畫山川往往於世之所徇眉髮形似之間而超然於其性情骨理之深者已故僕亦爲一言以從諛於長者之側然公再遊雲巖以歸則其所及異人擘畫當必有兩相印而無逾焉者不盡不盡

與朱職方書

執事之移官也僅及南北書相報者再而執事以名才而入省署其所掌內外封疆及諸將帥所提枹鼓而謹斥堠習戰鬪其相短長緩急處當必有爲國家建石畫而貽訏謨者僕旣坐罪廢不得與聞執事所從畫省中視草銘柱之詳而所自以衰年與二三社友杖屨於泉石之深嘯歌於薜蘿之叢相與朝且夕者特煙雲麋麇焉耳而執事倘亦不之知也一在日月之際一在吳越之陬其不爲隔越非畫之所思則夜之所夢耳頃浙中戍兵

鼓譟事聞 朝廷間除其一二首亂者而安其反
側飽其餽糧似無甚難料理者特江以南年歲數
侵田野多困自保章告變以來訛言數起妖僧近
訐諸州若沸蓋 國家承平世久草莽覬亂非
廟堂之上於小民疾苦破格拊循而所遣軍門一
切兵食盈縮翕張聽其便宜行事不從中制恐多
可憂此於 國計所係匪小而老夫所側身北望
者也執事官不過五品祿不踰百石然名動 中
朝材擅四海而機宜所發屬肺腑心膂之間其可
多讓乎哉先輩劉忠宣公大夏一生功業大較從

郎署間起竊恃知己故敢盡言如此伏惟留意焉

復王敬所司寇書

春深覽邸報知兄丈坐構去而僕之鞅悒歛歛者
久之累旬日感額縮肩不自已兒曹及他相知者
並謂僕曩去官時猶不至若此嗟乎天生豪雋不
羣之材當爲國家建卓犖不世之業僕少時猶不
免沾沾自喜况忤執政者三彼所甘心盖有深於
涉渤海而險於臨太行者僕方以奪官爲幸也故
內自量其技之薄而外復安于數之奇以爲譬之
瓠落云耳迺若兄丈僕每共知己屈指竊謂古所

稱海內無雙者頃勘邊一疏並今 國家石畫世
所未必知而亦世所未必敢言者今忽廼爾豈卽
以此坐忌而蒙詬邪嗟乎我知之矣賈生所爲痛
哭流涕及鼂錯所上兵事積粟及募民入塞諸書
到今來猶震耀世之耳目然而絳灌條侯以下卒
不容之朝廷之上蓋自古記之矣詩不云乎天寔
爲之謂之何哉餘所欲言見副札

與吳崑麓國子助教書

言別來已十數載而僕之髯旣白齒亦搖且落非
故吾矣而竊思崑麓曩年之氣譬則干將之薄雲

霄而犯牛斗者也其猶當時綰帶而促膝者之舊
若將與晉雷令張華輩相爲吐顰露穎已乎抑亦
聽其土之汨而翳之蝕也乎以公之文不及舉進
士出而服官復落魄多不偶海內無不爲公扼腕
者然楚之荀卿止於蘭陵令漢之賈誼董仲舒止
於相長沙相江都相膠東天之豐其才者未嘗不
絀其爵與名位也公得無爽然自失乎而况聞諸
公子翩翩漢庭且以收公未竟之志乎若僕則年
已入衰而長兒積頃復沒公之下視故人所爲分
痛而抱酸者何如也雖然僕抑棄如破甑不復顧

矣日惟擁膝支頤聊爲閉戶自吟耳公其有以憐而教之否

與甥董進士書

南宮捷音一至兩肘之間殊覺翼而飛也已而再聞大廷之對傳臚殿中亦可謂始進者之榮矣雖然吾尤不能不厚望焉天之生材也甚難而君子之以其材成且全之以副天之所望也甚不易况筮仕之初譬則築室者之立址也故曰君子之仕也莫重乎其始進當必內以審其志之所嚮與其器之所安外以考之古人之所不逮與今人之

所不能猶之射者之懸鵠於百步之外而吾將持
弓審固以求其命中者而其大端惟在於明學術
擇師友審去就夫所謂學術無曰世之博聞疆記
侈膾詞章而已也須本之身心性情之間以求其
安身立命之端次之練習古今之際以參之經世
酬物之用其所讀書須先六經下及周程張朱語
錄然後參之真西山心政二經與宋名臣言行錄
之類此則終身名業之案也夫所謂擇師友無曰
世之綰帶而交銜盃爲歡而已也須於 中朝擇
其海內人倫之厚望以爲之師於同輩中擇其抱

負非凡者以爲之友與朝夕講論又必降氣遜志
其間斯則所聞者無非正言所見者無非善行世
之一切傾邪險詖吾之耳目不以濡染其間諺所
云蓬中之麻不扶而直是也夫所謂審去就此則
尤所謂終身受用喫緊處也大略自古以來世挾
雋逸之才而盛赫奕之望者固多借推轂之譽然
亦未嘗不叢側目者之忌其所推轂者未必能爲
我建不拔之基而其所側目而忌往往或自貽以
負俗之累矣漢之賈生魏之禰衡唐之王勃以下
並坐此願吾甥於此須按古來傳記所載及我

國朝名賢鉅卿某人弱冠立朝者後來終身事業
作何結局某人崛起一時者後來終身事業卒受
跌蹉某人始雖蹇訥仕路稍屬遲徊已而資深望
重並建名業某人始雖得志聲施當塗已而構猜
蒙詬卒毀生平此古之人所以寧爲璞中之玉以
待世之別足者之求蓋有以也以上三言不勝區
區在吾甥固自負長駕不馭之氣而在令祖暨令
尊當亦自有過庭承帷之訓吾猶不能爲喋喋者
第以骨肉之間苟有寸知不得不倒囊傾囷而吐
露耳其言雖不文而其義亦或有攸當幸吾甥命

童子障之臥榻之側稍代古者盤盂戶牖几席刀
劒之銘焉幸甚幸甚

與甥顧侍御書

甥巡倉以來嘉湖蘇松間一切輓漕而輸稅者無
問軍與民頌之如挾纊然及讀條陳江南民瘼十
二事宜言言中肯綮切名實悉利弊吾曩覽甥所
著舉子業連翩熠燿竊謂有舅家風及獲疏稿顧
自謂不及也所惜者諸州縣有司或未必一一調
劑如甥指揮耳而今而後願甥悉心 國家典章
及兩漢來到今名臣奏疏吾釋褐時第與三五同

志之士蚤夜鑱心於文章詩歌之末以相矜覆已而譽日以起謗亦隨之及出綰印綬爲縣吏雖所嚮抑嘗射一時之聲以馳驟於世要之淺心浮氣非古之湛深凝靜而致遠者之器於今猶自恨也甥之才譬之干將莫耶厚爲韜其光而斂其鋒慎勿輕以之截盤匱刺犀兕而割鴻鴈也董甥過亦煩出此與共商而教之如何如何

與董甥儀制書

年躋七十吾方愧學不聞道偷生於世耳故以懸弧之夕囊一劒一瓢以自逃於西湖煙波之深絕

賓客遠交朋而兒女輩一切稱觴上壽並不以及
甥從日月之際顧貽我以書惠我以綺繪兼金之
賜慙謝慙謝比來藉庇亦多康食第汝母從去秋
來多病臥時起時躓令我忉怛而四月初六妹氏
以產難亡矣又聞甥所生孫女亦以疹亡酸惻酸
惻比來省中視草暇一切學問文章日進否傳曰
仕而優則學大略古之豪雋之士須於學問中刮
磨洗鍊令吾心於進退古今囊括宇宙時時有下
手處日知其所亡月無忘其所能聖門所謂憤與
樂兩者如環然慎勿悠悠虛過光陰也

與王敬所書

近攜最幼兒附仲兒之廬以居蓋憐年逾七十謝一切賓客姻族蓬其首垢其面而托古之灌園叟以息機於其間耳日向午從臥榻起忽得兄所遣省廬者之使移書覽之輒然如揖雲將於其堂而與之語也且嘉且驚嚮所謂初聞兄罷官之報不勝感愴非爲故人區區升沉顯晦間也僕少頗自好願附古之勳名之士翱翔當世然旣以之自好亦以之好天下之士共爲同心戮力饒志盛氣於其間者及僕忤世坐罪廢而竊睹兄擘畫古今指

揮得失其所洞中關肋剖皙事機於今海內無雙
者而世不察卒以莽伏彈射者之言點污而去之
又從而錮之謂之何哉莊生所云龜之曳尾於泥
者彼固一道也非僕與兄之旨也僕幾擬過兄所
將邀兄共尋石梁之勝抱膝而吟掃巖而嘯及聞
沃洲公之變僕且往哭於其家視其孤收其遺文
於以東過海上也顧秋以來病往再至今而來書
所諭西湖秋社之約令我兩肘頓翼而飛矣非僕
尋兄兄卽尋僕也

與吳悟齋中丞及姜鳳阿祭酒書

言別來忽已深秋近獲公從石門道中所寄書知
公與鳳阿公同過華亭且轉西湖矣此則兩公者
向平康樂之遊也僕豈敢後特兒妾輩並臥疾牀
榻間僕未能遽棄去相從然世之所矜西湖者大
較特在煙波游冶歌舞綺麗城闕逶迤樓臺蔽虧
他如孤山六橋漁梁荷館之星羅而提綰者耳然
譬則臨池窺妝者之淺而已南山之南北山之北
山愈深則泉愈冽而其谷愈幽薜荔女蘿之所叢
鼯鼯猿狖之所宮琪花瑤草之所布懸崖墜壁之
所經甚且鳥窩之禪羽化之客相與攀鶻栖捫虎

窟而魚且鉢於其間非特學士大夫之所不及遊
抑且樵斧漁縉之所不能徧者兩公過焉知山靈
必爲掃雲翳排霧氛而待矣寧能裹糧而食肘瓢
而飲借榻於壑絕者之廬或混緇流或擁黃冠或
嘯泉石或狎麋麇爲旬日匝月之遊否乎知兩公
此行當及減騶從避姓名杳然長林之深而不知
其所之者已兒妾輩稍謝藥餌僕將躡蹤附景而
追隨之而人或不之知不能以吾告幸兩公所當
巖賦而竹吟處按時日題識其旁俾僕獲抱巖而
呼穿竹而尋僕不能卽兩公兩公當或卽僕僕雖

衰且老猶能爲兩公記茲遊以貽後之好事者也

與潯陽宗伯書

適有客攜繪畫屏障者過山齋其一則王公貴卿
所擁曼姬者百二十人而水晶之簾珊瑚之几與
夫彈絲揚吹之歡相爲掩映羅列於曲旃之間其
一則牡丹芍藥五色熠燿文杏雕蘭紛錯若帶古
所稱金谷者是已僕竊思惟翁之堂爲稱當其廣
廈之上微風泛瑟其宜一也騷人墨子分曹賦詩
其宜二也珠履貂裘更席洗盃其宜三也歌梁舞
榭塵蜚若隔其宜四也客醉不散夜半霜華其宜

五也至於僕之如斗之室圖書雜遯所相與者綠
蘿之影紫苔之色而已安所用之故謹爲引上况
令孫膳部自天來歸畫錦如雲賓客前列公得無
賞而進之於以使我二三知己爲之縱飲狂歌呼
盧唱梟其間否乎

與劉時泉司業書

秋間獲公手教且以覽鄉錄而不及知兒曹之叨
第甚爲我悽惋而垂慰也然公旣以不列名而飲
鬱則其以列名而鼓掌也多矣感戢感戢公由侍
從過南雍已久旦夕當以學士召不然且領宮詹

白麻之拜行且次第而僕以七十老人內之旣不能以其身容於朝廷之上共公輩策勛明時戮力當世外之又不能尋古之異人者流嚮山澤間稍從熊經鳥伸之訣以習長生所自好者區區詩歌文章之什或與山氓野老奕棊緡釣相朝夕耳公得無憐之乎近覽邸報中朝耳目又行震盪一番茲固天子聖明與諸執事鳴伏攀檻之功也然其間指陳忠讜固多而洗蕩蒐羅抑過僕嘗讀漢書公卿列傳至師丹翟方進朱博等又如宋史所次熙寧元豐下及元祐之際君子小人相

爲出入升沉未嘗不廢書而太息也何則敎鼎沸
者抽薪爲上水擊次之不識公謂然否偶姪孫文
炳過太學特具書問候稍綴通家子弟之末耳幸
爲左盼焉

書

卷之五

五

七十八

卷之五

茅鹿門先生文集卷之六

歸安茅坤順甫著

書

謝穎陽少宰書

僕謏劣無似所荷公道誼而骨肉之者二十餘年
于茲曩者積兒之沒聞公泣然飲痛者久之其所
爲書吊且慰者一字堪一淚今緡兒獲以文章附
弟子末席沒且臨風而悲悼之者如彼則其存且
叨第而攜持之者何如也

與甥顧儼韋侍御書

甥昨臺中所建十二事疏鑿鑿中名實按利害
聞蘇常以下並已畫一施行至於田地一則之條
此殆吾湖中第一喫緊利弊處萬曆十年已按行
矣近緣十餘勢人年室以吾甥左遷而遽爲變亂
黑白以淆之撫按諸臺之間甚矣可爲太息也然
聞撫按兩臺初猶中持專待郡縣之歸而爲叅決
數日來聞郡縣間爲勢人所劫外則猶爲好言以
謝百姓而內則密以勢人所授者揭而覆之兩臺
矣嗟乎嗟乎何吾湖民不幸之至此也請以數言
折之經曰底慎財賦咸則三壤蓋言按其土之上

中下而量爲賦之輕重法也湖之絲綿衣天下故
稱爲沃野而湖之絲綿從地出故利爲最盛且湖
之患在水而湖之圩田十年之內所被水而災者
六七而湖之地並高阜故其患獨無此外猶有一
曰地田則以地而開成田其高阜故與地等而無
水患者也二曰蕩田則原係地額而介乎沼沚之
間淤泥歲壅此其高阜亦與地田等而無水患者
也大略地之所出每畝上者桑葉二千觔歲所入
五六金次者千觔最下者歲所入亦不下一二金
故上地之直每畝十金而上中者七金最下者猶

三四金圩田上者歲所入米二石以上中者歲所入米一石五斗下者僅數斗被水之年則無粒矣卽如地田蕩田無論水與旱歲所入三石二石故其價亦與地相爲甲乙由此言之則地之賦例當從重而田之賦例當從輕三尺童子所不辯而知者只緣上產並爲勢人鉅室利其入豐而稅之約不恤厚貲買之此輩力能撻郡縣賄吏胥而下產則十年五七災者大略盡在小民旣貧且弱無以聲之當路耳甥之去年此疏蓋湖民所欲俎豆之者去年郡縣採公議而上之兩臺兩臺亦順下情

而行之布政司只緣建議者甥也而湖之勢人鉅
室所私啗而怨之者亦甥也甥偶落職諸所不便
者紛然若蝟毛而起以反之矣蘇州固則甚龐雜
而太守王儀出而一之嘉興亦然且德清亦一則
而我歸烏獨窘抑至此聞執政已洞哲安得倜儻
之士而共議之也

謝馮太史書

僕無似獲從公西湖之上稍及聞公所品畫世之
文章大略世之所競者譬則女之冶容而鉛華也
羅綺也與夫明璫而翠爵也而公之所指則在朝

霞也芙蕖也與夫凌波而鳴珮也僕歸以語之見曹及帷中他弟子半解半不解然獨好之而數借公所指以程督其間顧兒曹以下或有志而未之逮焉頃者兒之試南宮也適公在事遽獲引之門牆之末豈以其嚮所半及解者而輒收錄之邪嘗聞宋元祐慶曆間士之以文章而進於天子之庭者非楊劉不以與獨歐陽公出而天下之文章始知復趨於古蜀布衣蘇洵老矣一日攜其二子軾與轍以遊於京師歐陽公知貢舉旣錄其二子而并及其父之文章之名遂以擅當時而傳後世然

則僕衰且耄矣罷官來已三十年于茲不及攜其子出遊矣而公之錄其子寵及其父得無老馬之伏櫪也且別爲噴珂跑地而悲鳴者乎杜甫有云每依北斗望京華僕於林壑所願隨明月而從公金馬承明之間相爲翱翔朝夕者殆什伯千萬也

與鍾文麓大尹書

傳曰上失其道民散也久矣僕附公綰帶之日淺知公不能深獨覽睹公舉子業非世所習勦麴粉黛而已者僕每嚮仲文謂公異日必以吏業名世已而公中鄉試後絕去故時戚里稱觴者之歡匿

蹤閉關攻苦食淡益發憤爲文章及第進士抱牒
出爲令其所經經自好復如初甚矣公可謂卓然
力古之道而不惑於流俗者僕好古之道而不能
畢其志及聞公抗古之道而不同于俗安得不神
馳臭附於公之左右乎及公之令惠安也聞頗與
田野父老相爲吐哺僕固知公非今之吏而已也
惠安之吏民不能遮留公闕之持節使者相與飛
章上 天子又不能強請公今且不免更賢樂
平夫民之情一也詩曰愷悌君子民之父母而曾
子亦曰民之所好好之民之所惡惡之此之謂民

之父母要之惠安之民此情也樂平之民亦此情也公能好民之所好惡民之所惡而一切世之作好作惡不以雜乎其間則惠安之所席而行之者固當洒然而行之樂平之鄉也又豈有二乎哉予雖不知惠安與樂平據客所傳大較惠安之俗近於癘瘵而所先者在撫字樂平之俗近於獷悍而所先者在剗割然於剗割之中第能持父母之心以爲痒痾疾痛其間譬之瘍醫者察蠹肉闕血而砭劑之耳孟子亦云必如此然後可以爲民父母夫所謂必如此者一切黜陟刑殺並出於民之情

而已不與焉茲卽三王而上之政也又何有於今
之吏治邪公行矣不能追公西行之車而共爲傾
吐矣惟公以其所故施行於惠安者移之樂平移
之上失道而久散之民而守之不變焉優柔以俟
之公當尸祝茲土而異時甘棠之愛所與豫章江
流川引而戶漑者百世矣茲固僕之私也不盡不
盡

復胡敬堂大尹書

公之才練而深曩所發之爲公車業者以之掇一
科第當如探丸耳顧數困之有司而僅隸之貢然

卒亦以試吏部高等而綰

天子印綬出令英

山矣今

國家制以貢起家爲令者非南入桂林

象郡牂牁鬱林之間卽西界隴右羗中而北徙金城玉關以及盧龍玄菟而東者也故其朝而謁郡廷夕而乘亭障所擁者非氊裘卽油幕所食而飲者非羶葷卽蹲鴟僕嘗提兵百輿夾經塞上縣大夫之抱牒而過者大較半雜慘黯之色少夷猶者也而公釋褐輒令中州其去故鄉特千里其所乘風土與服食也無相遠而公又以才之練且深者爲之端冕而南面其間數有客自中州來者僕數

詢公一切簿書聽斷之概客未嘗不稱善也抑有他使過陸合肥陸亦嚮使稱公嘖嘖不置也忽辱公所遺書又孳孳及僕之曩宦遊處所按行故事公得無於抱琴之暇爲陽春爲白雪而於以思我之同曲而聲相應者乎僕扣使者治狀大較與客所傳及陸合肥所口授無以異甚矣公之得志而聲施也語曰行百里者半九十詩曰未終令譽願公以僕所聞久之或四三年或五六年無改其初則不特世所美璽書之召行且尸祝而俎豆於其土矣不盡不盡

與張督府崑崙公書

頃戍兵鼓譟一節非敢稱亂也大略此輩自海上
烽燧以來前軍門所從遑急中外旣困於島夷之
力鬪內復厭夫調兵之兇悍故募金衢及處州一
帶掘山竊礦之夫要之漢所稱羣盜者之遺也當
是時專闔者方提枹鼓急矢石故不得不捐厚貲
以招之而此輩抑遂稍稍習戰鬪赴湯火所嚮亦
時時摧鋒斬馘以爲功甚且譚司馬戚將軍挾之
而閩挾之而薊上之人所驕而參養之也非一日
矣其中豐衣飽食載橐而歸什伍閭里轉相倣倣

父死子繼兄死弟及頻年以來東陽義烏諸州縣間棄累世廝山剷崖之業執戈爲兵什而五六矣無他習之所在其勢然也衆且謂大司馬胡公沒後海上烽燧不至所從諸將戍卒大較共爲輕裘緩帶以相躑躅而嬉耳可無事者然省兵可也省其兵之食不可也彼旣以其身藉之於官無復別爲父母妻子之養安得時贏時縮曩軍興時月糧外別給行糧間有摧鋒破陣卽冒不貲之犒故衆貪而競前近旣海上無事又從而於其所例給月糧之中去其什之二三甚而或給之又不以時又

從而以子母錢陰奪之焉獵犬犇鷹肉食不飽能不號而颺去乎近年浙中多盜亦大率坐此旬日來或謂此中有飛揚跋扈之士不可不力除之否則必多他變或謂事體已緩耳目已靜稍從月糧中優以一二卽可無事愚竊謂二者皆過也 朝廷有兵制軍門有軍政唐末藩鎮之禍百年槍攘與五代相終始其初抑特起于戍卒耳嘉靖大同之變當事者以拊叛爲名支吾了事已而首亂者避罪入胡幸亂者乘瑕蹈釁迄於庚戌狂悖犯闕此其一也近復有南都黃侍郎之變二三年間勢

屬鼎沸非李克齋中丞由淮上入領司馬痛爲懲創則其事亦不能遽安此其二也愚故謂後一着妄也至於此中疑有飛揚跋扈之士又屬過慮漢袁盎不云乎彼吳安得豪傑而誘之吳得豪傑亦且輔王爲義不反矣彼並颺颺無他計者况公以中朝之望乘傳而出彼且落膽矣愚故謂前一着亦妄也據愚見彼其初特計出無聊譬之狂病跳躍已而痛定思痛自謂法在必死天威所嚮倘及宣言前當事者委屬處分未協則彼且感且怖畏罪不服公仍於將領中擇其稍能輯衆而不相猜

貳者令其自縛首亂其餘煽誘一切便宜覆以威德此特在公七筯間也第其中必有陽爲效順首鼠兩端而內實觀望傾危不測此其跡雖不可以名坐而其中則爲胎禍釀亂之甚請公遲久而得之亦遲久而後假他事以蒐治之蘇文忠公所謂齒脫而兒不知大較愚見如此此事毛瑣不煩盛慮特東南三十年來軍旅之騷驛兼之以饑饉之相仍其役於官者上下例托節省減削過多而其業於田野者戶口痼瘵餓殍相望妖星以後訛言數起幸我公以石畫舊臣暫填吳越非於一切無

名之征畫一條疏罷去則民漸不堪今日所急者
恐不在二三跳梁之夫而在于千里痍瘡之民引領
而望公衽席之耳

與大司馬劉帶川書

言別來僕之形日以頽髯日以抽白求公曩所習
睹故吾者眊焉已什之五矣而客從北來僕時時
覘問公起居客往往謂公特躩躩嫖姚間擁騎歌
吹而田獵乎長林曠埜之間晚則輦飛鳥狡兔以
歸狼籍雜遯甚且無筭古者秦風駟鐵所載諸什
是也公之氣亦雄矣僕聞之不覺神馳且願隨南

風而從公蹠躓也偶過姑蘇逢張鹽使所攜健兒
敢附書以候且欲公知僕雖衰猶能棹滄浪而行
歌於五湖七十二峯之深與公載獫狁驕之概無
相遠者一笑不盡不盡

與杜靜臺節推書

聞公以南宮不第遽爾謁選不知者以公繫海內
之望久矣第不當令鵬鵬之翮而從鴈鷖於藩籬
也其知者抑且以 聖天子在上賢公卿在下
比年來繇乙科起家累官御史尚書郎及二千石
而上甚且入列九卿或按節開鎮者數矣而僕之

愚則竊以公之學道三十年于茲信於昆弟支庶
信於鄉黨朋友又且信於四方同志之士公今日
雖不及掇一第與世俗所尚者相馳驟然公特按
學問所自得處出之以臨民蒞官出之以御下獲
上古人有言曰愷悌君子民之父母又曰上失其
道民散久矣如得其情則哀矜而勿喜以此日夕
孳孳焉鑱之於心砥礪之乎政事而因以念其本
原得力處他不暇遠引周濂溪程明道楊龜山朱
考亭輩其於仕路亦不及聲施當世然而州郡里
社間於今猶尸祝而俎豆之者不忘也先輩所謂

得志澤加於民一命以上皆是矣豈必世之所競
曳紫綬佩金印叱咤風霆乎哉茲固公所自信而
自好當不待予之喋喋者然僕有尺寸之愚不敢
不以獻孔子曰由也果求也藝賜也達於從政乎
何有要之孔門所事者惟仁而至於從政則又獨
挈果與藝達三字爲符固自有說也卽如孔子之
爲司寇首誅少正卯墮三都卻萊夷一切作用固
有翕張予奪其間而非世之儒生曲學所知者故
曰仁術也幸公留意焉

與胡舉人論舉業書

舉子業一節淺視之似屬儒者末技苟於中極其深而研其幾古人所謂非六經之旨不以存於心而措於辭非吾所蘊之爲心而吐之爲辭粹然得聖人之至者則亦不能如百川之流行浩蕩而注之海予故曰聖學以洗心爲功而舉子業亦當以鍊心爲案吾輩能鍊其心如百鍊之金之在冶斯之謂自得而資深逢原也請兄試舉其心而反觀內照之得無猶有砂礪鉛汞相雜而錯出者乎諸子一桂輩頗知發憤爲文章前問師友之最者僕首以兄告之僕之私不特爲子姪輩求師友於兄

以發指南之車抑亦併欲邀兄過草堂稍得以共
兄早晚相爲折衷其至耳

與吳鳳麓大尹書

嚮嘗痛故司馬胡公於浙有百世不朽之功而卒
爲忌者所構公議凜凜不於其提戈斬馘處當於
其鄉發之已而不偶豈 今天子明盛而日月
之下猶有覆盆邪太息太息然所諭祠之學宮亦
公之吏業一名案也萬惟明示以慰懸懸

與邵梅墩中丞書

曩年過壽先公獲從遊累日承公推先公之愛不

以鄙夷若將憐其世講之末深爲縶縶而骨肉之
者公之德望矯然中外而海內人士共仰風猷僕
瞻依雖切書問獨疎何者年入衰遲譬則繼樊之
羽伏蟄之蟲無從竦翅張翼啓坏伸吻而飛且鳴
於賢豪長者之側耳頃者公領節出鎮荆襄適地
方災荒公所請蠲開賑招流亡卹困阨督諸州郡
勞來其所全活者不知其幾十萬人大較與宋富
鄭公之撫青州無以異鄭公抑自謂勝中書令二
十四考而復有安慶一帶揭竿斬木之寇囂聚流
劫而南竄江黃以上公復提兵命將斬馘獻俘卒

及底定公非詩人所稱江漢之功者乎僕切嚮往
願爲公依倣凱歌附頌金石而恨以道遠不知公
帷幄間一切紆籌本末也如何如何

與費唐衢觀察書

公按節入閩而浙之將士吏民所提遺綬而奮報
懷挾纊而感恩者於今鰓鰓然如一日也而下走
則尤深何者人生世間知己無幾獨憐公且移官
入閩而下走之年日益衰以耄於園林泉石之佳
猶支離杖屨千里命駕一段勝緣大都作隔世事
矣惟我公宦轍再爲過浙倘下走未填溝壑或及

綰帶相從銜盃爲歡茲則僕之所無忘眉睫也門
生施可大以郡司理之最聞嶺南今改建寧同知
起家乙科故其浮湛若此嗟乎抑騏驥於鹽車安
能展千里之足乎惟我公首爲拂羈而飾駿焉令
施子蚤爲著鞭茲則伯樂之所以空冀北之羣也
不勝勤懇

與姚華麓憲使書

鄱陽詹君篠山世其父愛山所傳堪輿家學東望
海上多異人且謂必有名山大川以孕毓其間以
故抱青囊通謁門下倘辱賜之緩頰而譚掉塵而

畫當必能爲公擇一牛馬嘶之地以報知已也

與趙麟陽中丞書

山陰趙生名紳者以繪事遊江海間僕衰且老獨於佳山水不能不時時杖屨出遊或及嘯且詠而趙生抑嘗盤薄解衣輒爲圖寫雲煙泉石及其巖嶠嶇嶇以歸而或有好事者載酒逆之共爲淋漓俯仰人或以僕輩恍然仙遊也每恨獨不及候謁門下故請僕書匍匐以見不識公肯賜之末席否古之一介寒士依世之王公以顯技術者何可枚舉倘借左盼信生之奇逢而亦公之好士之一班

也

與吳悟齋中丞書

頃覽邸報知兒曹從事西臺僅及再旬輒入薦草
稍聞 中朝或爲獎譽然據愚見得無犯古所稱
沾沾自喜者之戒乎僕之區區惟願此兒進以師
事國之元老如公輩退且兄事疆立博聞者於以
上下古今討論得失持之以深畜之以厚茲則父
之所望於其子而遲之異日者傳曰羽毛未成不
可以高蜚學問未成不可以強仕伏惟公朝夕而
課督之二三年來臺諫諸君子及郎署間少年盛

氣者大較金以 天子及諸公卿開顏納諍往
往掇拾浮言搖撼國家或傳中有行險陰賊者爲
之鬼魅其間甚非所以持明盛之世也不知兒曹
知領訓誨否僕以淪廢旣久於中外事不能諳習
然念兒之深而憂兒之切不無寤寐惴惴然者惟
公膝席而教之不盡

上穎翁相公書

肅廟以來言路甚廣茲固我 君相盛德事第一
二年間其所懷忠持赤者固多而煩言亂聽者亦
起科場一節口舌更橫然 主上每爲優容相

公輩特爲解勞批劇而不以厭者宣德弘治年間
所不逮也東南州郡所被災傷僕年垂八十未之
睹抑未之聞者頃聞 聖天子破格寬卹第涸
轍之鮒望恩西江閭閻父老尚深杞人之憂邇來
臺諫交章公車大司農業已題覆第不知處分竟
何如耳語曰東南民力竭矣唯相公留神焉

復陳五嶽廷尉書

已丑秋得公子所從越州寄公所爲僕序拙刻者
手而讀之不勝感激踴躍歌且舞之公之所言金
庖犧畫象以來文章之旨而僕少所自好抑妄謂

天地萬物之情各有其至而學者惟本之吾心以求之六籍之深則固有釋氏所謂信手拈來頭頭是道者古之名家崔蔡左陸而下其材非不驚且猛也然於古作者之旨疑或有間蓋謂由其心之至而出而成聲則種種色色金所以摹畫天地之化工而爲文之在茲可也否則譬之貧者之持鉢而乞市强者之行劫而剽路耳嘗共故唐太史荆川公面爲口畫合轍者什八已而荆川沒而世之豪傑雋偉者金以僕所好奴隸之士苴之弁髦之焉耳僕何以敢望公之厚爲篤信而謬譽之者至

此然於僕則仲尼所謂竊有志焉而未之逮者於公則莊周所謂斲輪者之旨百世所不易者歲暮時聞公已過金陵僕輒欲移所梓公序文跨驢而走都亭或邀公於牛首燕磯之間稽顙稱謝而併以出其自好而未之能者面爲印證也顧年近八十荏苒巖壑不能出門戶留滯至今耳忽辱手問及他貽示諸什驚誦且服茲特先爲片楮以復秋八九月間涼颼刻露落木喧蛩決當樞衣膝席以罄平生也

復王進士書

執事世家學以文章名東吳州郡間僕雖衰且耄嚮往舊矣頃者使自兒曹宦邸歸忽辱執事手札併寄舉業刻三冊且屬僕爲批評於以梓而傳之僕手而覽之者累日大較執事於舉業已得其髓大者山立深者海潤玄者鬼瞰而中所自爲鈞奇釣詭非惟經生者所不能言抑且有不能知之者僕何敢贊一辭於其間哉第叅而伍之執事所自好於僕所見猶有小異者僕嘗謂舉業一脉蓋繇王荊公厭唐宋來以辭賦取士故特倡此經義以攬天下材茂之士妄謂舉子業今文也然苟得其

至卽謂之古文亦可也世之爲古文者必當本之
六籍以求其至而爲舉子業者亦當繇濂洛關閩
以泝六籍而務得乎聖賢之精而不涉世見不落
言詮本朝獨王守溪爲最上乘唐太史輩間亦從
而羽翼之而執事且從諛僕集其大成過矣過矣
僕豈敢當哉然僕之所管窺而蠡測不敢不爲知
已者一傾吐之舉業一脈卽說經也歷代聖賢所
自見處小大深淺不同傳不云乎太山之於丘垤
也河海之於行潦也類也而學者卽其言而疏之
爲文亦當按其小大淺深之旨而各爲交流而分

析之卽如學庸語孟所載孔子與顏曾已屬不同而顏曾以下較之游夏輩又不啻什伯其間叙事紀事問辯質疑星羅雲遯而世之競爲勦襲者甚且影響而蕪穢之不特楚人之爲孫叔敖者衣冠而已往往田傭牧豎而富商大賈之飾甚矣其可笑也僕竊恥之然亦不免間知其非而或蹈之何者入魯而不得不爲章甫也入宋而不得不爲縫掖也此亦婦人女子之對鏡自照而復自嘲者執事之文雄矣據愚見所及抑不能不疑其或過譬之兵家執事所當與項籍鉅鹿之戰旗鼓相當

矣而以按之孫吳或屬一間也譬之談釋氏者執事所當達磨西來獨鬯禪宗矣然於釋迦所首雪山苦行及面迦葉處又不知一一合乎否也故僕讀執事之文多心掉目炫而於什一之間猶不能不少有齟齬離合故敢先爲書以請而不敢於執事所刻草草鐫次伏惟執事垂亮焉

與趙定宇侍郎書

僕無似罪錮且久而公獨推先大夫之愛數爲挂之眉睫口吻間何其勤也頃者天子且召公爲少宗伯不勝蛩然喜躍然歌且舞僕嘗妄謂士

大夫名業惟不同俗者斯能不干澤不媚世者斯能不擅權無他玄豹而濯之以南山之霧也而後其文章炳以蔚應龍而蟄之以九淵之海也而後其膏澤濡以沱然則二十年來公所繇文章侍從日月之際且進且退而獨矯然中持不詭隨不浮湛今之學士大夫所共爲望斗垣而瞻泰階者豈偶然哉 主上春秋鼎盛數以疾不視朝儲位尚虛四圉多故傳不云乎政且及子恐亦門下吐握焦勞之秋已引領引領不盡不盡

與周山泉督府書

公東山之臥久矣

聖天子採臣下言還之

朝請僕不勝爲

國家忤且舞然而衰老之年巖

壑之蹤無繇附青鳥白鴈銜書問候而公之博大

忠貞之誼蕭疎澹泊之襟未嘗不漑於心而挂於

眉睫也頃者緡兒以僕患瘍不勝索款於是上書

乞疾來歸道出撫治辱公憐之又從而移書僕不

肖併及分俸以投之公得無故人綰帶之恩而不

能忘者乎公之譽望冠中外

聖天子行且召

而席之樞筦置之左右叅大政鎮中朝旦與暮也

而僕頽然衰白所謂去日長來日短如欲再爲膝

席披風素掉塵摧今古恐須屬之再生也已寤言
及此能無感舊而懷悲已乎茲顓使函書以謝外
機杼聊以備公之授衣而家刻史漢鈔併詩文稿
一編則以僕之鉛槧筆研間附上求教而抑且欲
公知我之衰猶不致頽墮者如此不能盡所欲言

謝陳五獄序文刻書

僕少不自量頗好習爲文章詩歌之什願附世之
騷裏而蹀躞千里鴟鵬而翻飛層霄也顧以蹄之
窘而翮之鍛寘之泥淖困之藩籬久矣辱公所序
拙藁爲褒稱而詮次之且謂或升古作者之堂何

敢當何敢當伏思 國朝以來詩聲起自高徐輩
凌轢宋元已而何李中興而邊太常顧中丞鄭繼
之薛君采朱子升馬仲房輩繼之嘉靖間張子言
高子業王履吉黃勉之唐應德陳約之許子春蔡
子木皇甫兄弟輩又從而羽翼之已而李子鱗輩
翱翔郎署互相標榜甚且叱咤風霆而噴嘯日月
也五七言古詩及近體以下不敢謂金中律呂然
大較翩翩乎上附六朝下薄大曆矣獨於文章未
敢輕議宋太史後寥寥也王新建論學書及兵略
諸疏可謂千年絕調矣而江西以後猥視末藝卽

如唐王以下頗厭何李之抗聲藻而略神理也稍
稍於歐陽曾王若將共爲翩翩嫋娜其間然抑或
疲矣他操觚者輒呼曰某太史公也某班掾也世
之借耳傭目者一時不察共爲道聽塗說而附和
之然要之去古遠矣何則孔氏讀易猶二絕韋編
也達磨西來猶面壁者十八年而後折蘆東渡首
傳宗旨也文不本之六籍以求聖人之道而顧沾
沾焉淺心浮氣競爲拮据其間譬之剪綵而花其
所炫耀熠燿者若或目眩而心掉而要之於古作
者之旨或背而馳矣僕故妄謂 明興以來二百

年行且有韓歐者出風行海流大闡斯文也公得無爲之歎歔憤咽其間於以奮袂而橫戈者乎若僕則衰颯矣公所云云蓋不能不愧於心而鑱於衣帶者謹具書以謝外刻漢書鈔一百卷班孟堅所共太史旗鼓相當或得或失處抑稍爲鐫評其間其所橫加刪削者特人物表而下及元后王莽諸傳大都雜之以曹大家輩所附者耳倘及塵覽幸爲批示秋深以後木落霜飛終擬跨一驢走侯公於牛首燕磯之間綰帶膝席而聽公所折衷者不知其肯許否

與蔡南麓方伯書

僕罷官來垂四十年於世之縉紳學士不相及然獨聞聞公之道術德望傳所稱朝之著蔡國之典刑是也慨於心者久矣豈謂晚歲未填溝壑猶及公復按節浙上稍獲望顏色瞻簪舄及聆高論雖離乎道誼之深古人所謂招之不來麾之不去內之領衷百執事外之綱紀四方者非公之事已乎而先師來菲泉先生之孫曰拱日者過草堂數稱公過蕭山時時時諮訪其子若孫及遺書所世授處併投之以金已而再扣之先師令奉新時公甫

七齡然公以里巷長老所口其吏業故過其故里
詡詡齒頰若此仲尼不云乎故舊不遺則民不偷
公之於故令猶無忘如此則公之仁心篤行可知
公之於其故里猶且煦煦然如此則其遺骸所埋
與其子若孫所零丁孤苦而爲之拊循提攜也又
可知顧其家索矣猶幸拱日者稍稍可以文章潤
其身而繼其詩書之澤者也四應省試未及掇一
第以公無忘先世茲且抱生平所著文若干什願
出公門下不知公覽睹之他日或可列公宮牆桃
李否僕少受先師恩最深其所被督教而以國士

許之者最亟故今於公所當引盼處不敢不上書
陳謝而亦不敢不爲其孫請謁也伏惟留神焉

與石東泉司徒書

縉兄以僕衰且耄及聞去歲所抱瘍毒上書乞疾
南還稍及聞公所席君相之知與中外之望當與
前代名公碩卿相鴈次也不勝欣慰然而竊思今
日時事之亟惟大司農與本兵而已或曰馬市以
來邊備旣弛在邊臣則倚以爲長城而罷烽燧息
刁斗且陰以縞繒相羈縻在北虜則借此爲媒利
而擁氊裘邀歲繒且陽以部落相恐喝於以恣狼

貪於其側而覬覦非常之變漢鼂錯所謂諸侯王
不云乎削亦反不削亦反削之則反疾而禍小不
削則反遲而禍大今日虜情得無近是乎 廟堂
之上其所陽爲不絕者不得不在此而其所陰爲
力闢者不得不在彼然則七鎮之間其所合各饒
之以兵食而布戰將選銳鋒購死士襲部落非其
所獨亟乎僕又爲公思之漢武帝元狩以後海內
騷然矣而桑弘羊輩不得不網罟山澤也唐明皇
天寶以後乘輿播遷矣而劉晏輩不得不銖求鹽
鐵也嘗覽公所疏請罷少府錢二十萬 主上

猶不從而況他乎近據福建所檄傳日本又驚然
矣僕私計關白大約一梟雄耳或特威劫海上琉
球以下附近諸夷之貢而未必敢深犯也然聞福
建漳泉之椎剽少年其所竄入者旣衆當必爲之
鈎引嚮道浙之溫台寧紹及杭嘉以下全以波濤
魚龍爲州郡者也浙之督府亦不得不爲備嘉靖
以來其所晏然輕裘緩帶者已三十年而一旦起
而從事不得不首之以廣製烏艚船遮擊海上其
他所當別爲選摧鋒備火攻瞭海洋種種諸費恐
亦不下數十萬也及按庫貯特懸磬耳旦夕當請

書

卷之六

三

三七十二

內帑及停歲解或他借鹽司關市之入不知公何以待之僕內抱漆室之憂外切知己之籌畫不寧食夕不寧睫者固懸懸也惟公留神焉

與賀道星秀才書

公之才譬則青萍也世之士固當識之豈謂又復荏苒留滯今年兄輩師友間脫穎已盡獨公猶抱卞和之泣耳然僕恃公知愛不敢不爲一言大較公之文一切運格似臺閣冠冕處多而斌媚風流處少其所構思層閣繚垣處多而俯檻憑欄處少其所鑄辭魁梧奇崛處多而典則輕逸處少世之

之慧眼視之固當賞之休且炫而他俗眼視之抑
或駭且厭矣科場中俗眼者什之八九而慧眼者
特什之一二此僕十年前所嘗力剖肝膈面爲吐
露而公則所坐杜少陵之癖其詩曰語不驚人死
不休公得無近似之乎茲爲兒壻輩擇師席無如
我公貢兒公之舊弟子也而紀兒亦稍知慕公者
公倘不拒則不特明年而僕竊欲攀公遲之以二
年三年請公登壇而兒輩閉帷洗心以聽之願公
養成威鳳神龍之翮與鱗而併挈兒輩鴈鵠鰕魴
或及附之以竦超而點額茲則八十衰耄之所焚

香而顙天者也

再與石東泉書

寧夏之變數讀邸報所傳知上厓主上宵旰之憂而下煩我公之從中籌畫其所盈縮緩急弛張逆順蓋有縉紳士大夫之所不及知而羽檄烽燧間之所不敢泄者督撫將校以下大較稍稍有次第矣但其圍城中一則宗藩二則縉紳與脅從吏士而彼中狡且悍者挾之以沮軍興近讀詔書所馬上疾馳當已不復顧忌玉石蓋以棄之之道全之可謂深獲要領而諸帥嫖姚之氣當什

倍故時矣不知近已奏功否僕衰且耄然少附朝
請傳所謂與國俱榮與國俱辱茲固臣子所不忘
溝壑而况公於中秉軸則又急故知共安危蓋有
挂眉睫而切胸臆者如何如何

與兒縉卹唐比部後人書

丹徒縣故鄉宦唐公侃號默菴予令丹徒時聞其
父坐負官庫銀若干繫之獄而公從諸生中告侍
父於其側晝則讀書夜則擁護其父之寢食甚且
夏無蚊帷而不敢輟扇也郡太守聞而憐之代爲
處補前庫銀卒釋其父而出之已而中鄉試不及

第進士授永豐縣令頗多惠政召爲南比部郎父
之以病篤聞予素習其清苦度無以爲殮也卽日
措四十金馬上賫赴病榻間而公已沒矣其同官
蔡白石侯二谷諸公共爲且悲且歡卽以所賫具
殮殮當是時默菴公之子已先天所遺幼孫曰思
忠纔十五齡公平生不治家以授學爲業僅沙田
四十畝又以宦遊無貲以其田抵之門生某典史
公之喪雖還而無以爲葬也我又別措四十金因
約其同門諸友以義諭某典史典史君初亦恹色
而諸友共以義責之曰父母官旣憐其清白吏捐

俸金若干矣而君以帷中弟子能秦越乎典史君
遂以原券歸之思忠已而我復求唐荆川先生誌
其墓而又鳴之學使者祀之鄉賢又恐思忠年穉
且弱復請學使者給之衣巾守祠其事四十年往
矣今據生員卞可忠卽思忠之弟子攜思忠之子
某千里哀訴口稱予陞任後諸生情呈諸臺使者
共爲移文優恤內開勘得默菴唐正郎歷官清苦
子孫不能舉火殊爲可念查給入官寺田三百畝
准令孫唐思忠衣巾奉祠其田坐丹陽縣地方去
丹徒旣遠而地方佃戶朱孚盛等朋瞰思忠之文

弱輒佔而奪之於是思忠訟之丹陽縣丹陽縣勘
明給還而各佃戶之負隅而虎噬如故也非惟此
田之不得業而故所業沙田四十畝併以訟廢思
忠之喪今且暴露不能入土悲乎兩生過我左右
聞之並爲持酸欷歔流涕而况我追思曩日與默
菴公舊遊痛其歿而卹其孤者今困踣若此能不
爲之裂心疾首而泣下霑襟也乎今兩生之告猶
幸於絕路中又得一線其事在少府高春宇公卽
見之同年而又相知之深者也見可爲我千里走
使持一書上懇之我細思其田旣屬三院所會案

優卹鄉賢者而爲地方佃戶所佔又不以縣官斷
還者而仍佔之如故無他諸佃戶譬則鷹隼之羣
也區區一守祠孫譬則雀也卽如春宇公以故事
行縣語所謂鞭長不及馬腹勢不能久必得春宇
公親督縣令共詣地方丈量明白立一石書本末
云云而別召附近殷實之家當官給立印信佃票
其舊佃戶朱學盛等按法重坐一二人以示戒庶
得爲久遠計而前三院所行併今高少府公所勘
當不委之草莽也不然高少府公陞任以去而其
事又當如浮梗不免漂流矣

與張丹徒書

曩在華亭獲接公簪舄及聆公襟抱古所稱大雅之士穆風醴泉令人挹之神解飲之鬯懷者退而詢諸士大夫其所共爲語次之者嘖嘖不置口也今且以服闋再補丹徒丹徒僕四十年前所抱牒而過者時適比歲旱乾百姓掘草根斲樹皮以緩須臾之歎僕所匍匐窮鄉絕壑而與老穉相吐哺者於今耿耿也然而登北固眺金焦則江流若帶潮聲若嘯而間與二三知己晏歌其間又未嘗不杳然清秋明月之夜者公今過之得無按舊牘讀

殘碣而稍稍當公琴臺之側者乎茲以邑故宦比
部郎唐默菴公之孫過草堂敢勒書奉候默菴名
侃蓋躬古孝廉之道以勵末俗而非特今之人也
其病沒於官而無以爲殮且葬而孤孫攜喪來歸
也特篋中書數卷耳僕不得已爲之拮据其間其
詳在所獻高春宇少府公書中謹錄其副塵覽今
其曾孫應龍千里過僕蓋以僕嘗繕其葬祀之祠
已而撫按及督學諸使君所採風而弔之共爲會
案給丹陽廢寺者之田三百畝當是時邑之吏民
無不人人歌且舞之者豈謂其孫孱弱而其田又

爲地方數十佃戶所朋佔及訟之故丹陽公已經
勘明而諸佃戶之據猶故也今其事在高少府公
而勘明之後其所處分當倚今丹陽公朱景峯掌
握間嘗聞仁人之卹孤也如襁負其懷賢也若戶
祝其鋤強暴也又凜然斬蒿萊剪荆棘也高少府
公當必轉牒景峯公處語曰中流失維伏惟我公
轉達挈千金之瓠而投之焉幸甚